



FOKUS OP DIE GESINSLEWE

Kom na My toe...
Deel 1

*Ek het jou nog altyd liefgehad, daarom het Ek jou
met geduld verdra.*

(Jeremia 31:3)



24-7 GEBED VIR HERLEWING 1-7 DESEMBER 2025

God nooi ons deurgaans in die Bybel om tot Hom te nader. Hierdie uitnodiging vloei uit Sy ewige liefde. In 'n wêreld wat voortdurend meeding om ons aandag, word ons geroep om te reageer op Sy liefdevolle oproep.

Terwyl ons die eerste week van ons drie weke lange reeks, 'Fokus op die Gesinslewe', begin, moedig ons jou en jou huishouding aan om God se uitnodiging te aanvaar om tyd in Sy teenwoordigheid deur te bring. Ons vertrou God om gesinne in Sy liefde te verenig en hulle tot 'n dieper verhouding met Homself te laat groei.

MAANDAG 1 DESEMBER 2025

NADER TOT GOD

Nader tot God en Hy sal tot julle nader. (Jakobus 4:8a).

Kom ons bid

- Bring jou **hande en hart voor die Here in gebed** terwyl jy wag op die Heilige Gees om met jou te praat. Laat Hom toe om jou te oortuig van enigiets wat reggestel moet word (Jakobus 4:8b).
- Bid vir **ongelowiges in jou eie huishouding en onder jou bure** – dat harte na God sal draai, dat die dubbelsinniges Sy wysheid sal soek, en dat die krag van Jesus se bloed genesing sal bring aan diegene wat deur sondes uit hul verlede belas word.

Oorweeg: Sit vandag tyd opsy vir jou huishouding om bymekaar te kom. Luister na julle gunsteling aanbiddingsliedjie(s) en lees Skrifgedeeltes van aanbidding hardop, bv. Openbaring 15:3-4.

DINSDAG 2 DESEMBER 2025

WERP JOU BEKOMMERNISSE OP HOM

Kom na My toe, almal wat uitgeput en oorlaai is, en Ek sal julle rus gee. (Matteus 11:28).

Kom ons bid

- Neem 'n paar oomblikke om na te dink oor die Here se goedheid en loof Hom vir wie Hy is.
- Bely die kere wat jy en jou gesin selfonderhoudend was en bring enige bekommernisse as gevolg van onwyse keuses na die Here en vra vir Sy wysheid en hulp.
- Bid vir die **broodwinner(s) in jou huishouding en stad** om elke bekommernis op Hom te werp (1 Petrus 5:7).

Oorweeg: Kom bymekaar as 'n gesin. Deel julle uitdagings, bid saam, bemoedig mekaar met God se Woord, en soek Sy leiding om mekaar in liefde te ondersteun.

WOENSDAG 3 DESEMBER 2025

GOD VERWELKOM ONS VRAE

Kom tog, laat ons die saak met mekaar uitmaak, sê die Here... (Jesaja 1:18a).

Kom ons bid

- Dank God vir Sy konstante teenwoordigheid en wysheid.
- **Vertrou elke uitdagende familiesaak aan God toe**, nader Hom in nederigheid, opregtheid en in gewilligheid om die Woord van God te eerbiedig.
- Bid vir die jeug **in jou uitgebreide familie en land** om met God te redeneer oor die daaglikse kwessies wat hulle geslag raak.

Oorweeg: Moedig jou huishouding aan om moeilike vrae neer te skryf en dit in 'n fles of houer te plaas. Neem tyd om die vrae saam te bespreek, te bid en die Bybel te ondersoek vir God se perspektief.

DONDERDAG 4 DESEMBER 2025

'N FEESMAAL SAAM MET DIE KONING

Kyk, Ek staan by die deur en Ek klop. As iemand my stem hoor en die deur oopmaak, sal Ek by hom ingaan en saam met hom die feesmaal hou, en hy saam met My. (Openbaring 3:20).

Kom ons bid

- Dank Jesus vir Sy geduld en genade teenoor jou, dat Hy jou voortdurend opsoek en aan die deur van jou hart klop.
- Neem vandag tyd om werklik saam met die Here 'n feesmaal te geniet – om sonder haas in Sy teenwoordigheid te vertoef en Sy aangesig te soek.
- Bid vir **verlore familieledes** om die Here se stem te hoor en daarop te reageer en hulle harte vir Hom oop te maak in aanbidding en toewyding.

Oorweeg: Lees Openbaring 3:14-22 saam as 'n huishouding. Soek Jesus saam in berouvolle gebed en vra Hom om julle harte vir Hom aan die brand te hou.

VRYPDAG 5 DESEMBER 2025

BUIG VOOR JOU MAKER

Kom ons val in eerbetoon voor Hom neer, kom ons buig, kom ons kniel voor die Here ons Skepper! (Psalm 95:6).

Kom ons bid

- **Aanbid en loof God** deur Psalm 95–100 hardop te bid. Dink na oor die woorde en frases wat vir jou uitstaan terwyl jy Hom in aanbidding eer.
- Bid dat die **identiteit van jong kinders diep gewortel sal wees in die Here hulle Skepper** – in wie Hy hulle geskep het om te wees.
- Bid vir die kleinkinders in jou uitgebreide familie by naam en vra die Here om hulle deur Sy Gees te trek om Hom in gees en in waarheid te aanbid.

Oorweeg: Moedig elke lid van jou huisgesin, jonk sowel as oud, aan om voor die Here te buig – hetsy in persoonlike gebed of gedurende 'n gesamentlike tyd van gesinsaanbidding.

SATERDAG 6 DESEMBER 2025

JESUS IS LIEF VIR KINDERS

Maar Jesus het gesê: "Laat staan die kindertjies en moet hulle nie verhinder om na My toe te kom nie, want die koninkryk van die hemel is juis vir mense soos hulle." (Matteus 19:14).

Kom ons bid

- Bid vir die **kinders in jou huishouding en uitgebreide familie**. Bring enige behoefte, siekte of vrees voor die Here in gebed en vra Hom om hulle te verlos en te genees.
- Bid vir hulle redding – dat elke kind sal weet dat hulle **die Verlosser nodig het en hulle harte aan Hom sal oorgee**.
- Bid vir **gesinne met aangenome of pleegkinders**, dat hierdie kinders die liefde van Jesus sal ervaar deur die sorg en deernis van hul ouers en voogde.

Oorweeg: Bid Numeri 6:24-26 as 'n gebed van seën oor die kinders in jou gesin.

SONDAG 7 DESEMBER 2025

TOEGEWY AAN JESUS

"As iemand agter My aan wil kom, moet hy homself verloën, sy kruis opneem en My volg..." (Markus 8:34).

Kom ons bid

- **Dank Jesus** dat Hy die kruis in volkome gehoorsaamheid aan die Vader gedra het en dat Hy die sonde van die wêreld – insluitend jou eie – op Homself geneem het.
- **Wees stil voor God** en wag op Hom om enige begeertes of strewes aan jou te openbaar wat jou van algehele oorgawe weerhou.
- Bid dat elke lid van jou gesin **die Here daagliks sal soek en as lewende offer** tot Sy eer sal lewe.

Oorweeg: Moedig jou gesin aan om na te dink oor wat dit werklik beteken om jouself te verloën om Jesus te volg. Praat oor hoe dit prakties in alledaagse interaksies met mekaar uitgeleef kan word.
